



和6
465
4



井井堂集卷之六

蘇州府印

蘇州府印

小野傳子傳甫著

男 革惟新校

序

呂氏軍書序

者六藝之一而其用廣大矣傳曰物
其用後有泉象而後有流洩而後有教然
則天地初形今物既繁則教之事立矣為

和16
465
卷4



井井堂集卷之七

跋

呂氏算書序

夫數者六藝之一而其用廣大矣傳曰物
生而後有象象而後有滋滋而後有數然
則天地初形人物既著算數之事生矣為

小野傳子傳甫著
男 革惟新校

明治廿五年十一月廿七日
森鴻次郎氏寄贈



貞

其法也肇於隸首而詳於商高周公世之
所傳九章是也所謂九章者何也曰方田
也粟布也衰分也少廣也商功也均輸也
盈朒也方程也勾股也是此九法以推天
文以策地理以計人事大則百千萬億兆
經姦補小則忽絲分寸圭抄象銖可立而
談也可坐而策也本朝振古通算術者不
爲不多朝廷置四道博士而居其一三善

氏世傳之非尚其道乎故自天度歷紀以
暨井田廩稅無不彰明無不較著今人辨
明之者鮮矣余友野呂氏武人也仕宦之
暇有志算學沉思潛心積日累年遂究其
微旨也嘗告余曰夫算者乘除有常見簡
即用見繁即變不膠一法乃爲通術然近
世算家者流從事便易漫涉捷徑如用之
一方則猶可也而推之萬殊羸朒無方豈

非失之毫釐差以千里者乎我欲據其正
術而編算法也頃日編成需爲之序余不
獲固辭以首肯焉然而公務居多未遑詳
觀其書姑記野呂氏之平日所語以塞其
請後人有憑此書得其旨而知彼似是之
非則於作者之心亦庶幾手見者篤志焉

釋名便覽序

自古神農氏之嘗百草醫藥昉于此蓋醫

之爲道也用之足自衛身推之可以濟世
其稱仁術不亦宜乎然道有體用窮探素
靈之曠神聖工巧以立其本者體也旁通
本草之微君臣佐使以治其疾者用也余
故曰不察素靈豈醫云乎不識本草豈醫
云乎知體而不知用非醫也知用而不知
體亦非醫也體用一源顯微無間而後十
全之功可以獲焉是故古之良工以本草

當務爲急自神農本經以下桐雷李吳陶
徐諸賢皆有本草其餘頗不可枚數厥後
楚李東璧著本草綱目芟繁補缺列部分
類定爲八千一百六十種總據正名附釋
別號其寡者或一二其多者至五六或二
物而同名或子根而異號抑藥之有別號
猶人之有字與號人之執交也其親未至
知字號而能知其情之有哉醫之知藥亦

復如此其名號猶未審之曷識其平毒溫
寒矣彼別號異名散滿他書不爲不多而
當用束手者不鮮矣松軒長喜澁君長怡
之嫡子也澁君以昭代之良醫辱賜官祿
松軒夙勵爲裘之志允執精勤之業上自
軒岐下逮諸家方書無不該見又嘗研精
本草綱目患其別號之難辯揭倭字以爲
標而列各名上字之音聲相叶者附于其

下輯作三卷頃日編成需序于余并請命
之余雖不識方術而閱其書甚便觀覽因
名曰釋名便覽觀者憑斯書而解得之則
於刀圭之要其過半矣

野服正制題辭

子朱子晚年著野服見客嘗稱呂原明之
言從趙季仁之制事載于文公年譜羅氏
玉露然年譜略而未盡玉露雖寢備而其

言簡矣余患其制難詳因是揭玉露木文
附註於其下未詳者并按深衣道服之制
蒐輯當時鉅儒之定論間亦竊附管見以
爲成式圖繪于後便觀覽也凡幾易不措
方得脫藁於是就正于弘文學士林先生
損益踈冗庶俾考古者有所折衷云寬文
甲辰三月既望懋齋野傳題
題後數年會明徵士舜水朱先生來本

朝遊事我君余陶灸久矣懇求改削之
平先生指點無隱完補罅漏於是始愜素
願深以為幸丁未之夏野傳書于武州
不忍池上寓舍
衣用黃白青皆可
黃綠衣用黃或白或青亦可○按深衣制
幅或曰用紗及帛制之本文不言袂

我嘗見朱子畫像野服而立其袂廣
大長與膝齊且按道服制度其袖之
長可以回肘因是則袂又用全幅庶
全一衣之制云

直領雨帶結之

直領與官領異故謂之直領非對衿
之謂也雨帶者雨衿當腰之處及左
脇袂下內邊右脇袂下外邊各綴小

帶穿著之際右衿之末斜交于左脇
而一帶結之左衿之末斜交于右脇
而一帶結之○或曰設兩帶者不繫
大帶之時可結之已繫大帶則不結
兩帶亦可所以爲便服也

緣以皂如道服

緣用皂絹爲之領袂口及齊皆用二
寸半許如道服也

長與膝齊

其長及膝也是爲上衣

裳必用黃中及兩旁皆四幅

裳必用黃色也中及兩旁者言自中
而及兩旁也裳制當膝處爲馬面內
外各一一邊自中歷右而至于背一
邊自中歷左而至于背亦內外皆有
馬面○裳亦用帛可

不相屬

屬連屬也言裳之左右各開對揜於胸與背故不相屬耳或謂與深衣制衣下屬裳裳上屬衣之屬同義不相屬言上衣與下裳不相連屬也所謂衣長與膝齊則豈有衣裳相屬之理哉

頭帶皆用一色取黃裳之義也

頭裳頭也帶裳頭之小帶也言頭帶皆用黃色以取易黃裳元吉之義所謂文得中也是為下裳別以白絹為大帶兩旁以青或皂綠之別以白絹為大帶用青絹或皂絹綠紳之兩旁及下其制宜從朱子家禮見儕輩則繫帶見早者則否謂之野服又謂之便服

以間居對朝廷則野也所以有野服
之名見貴客則束帶足以爲禮見卑
幼則解帶足以燕居故又名便服也
圖并裁衣裳法載于朱氏談綺

柳絮詩序

夫青帝龍駕之末節墨客雅筵之勝遊宿
雨初晴惠風和暢暖霞靄靄麗日遲遲庭
散柳花蘇堤縮地溪點荷葉杜徑鋪氈輕

輕雪翻探支冬景於牆外片片風遶粘著
春泥于園中浮水爲萍飛空無蒂粉蝶共
與奏舞黃鳥於此發歌是日也豈無絲竹
之聲乎無比興之詠乎故勒十于之字以
爲韻或屈八又之手而爲吟遂命僕作序
不獲峻拒漫揮短毫云爾

送春序

丁巳三月盡日

九旬之春將行言秣龍駕載脂蝶車野子

簞食瓢飲送之於薄暮之天長嘯曰四時
之斡旋也如環無端終而又始故春生夏
長秋收冬藏四德各有所宰而不得缺一
非此四德則草也木也無遂生成之由草
也木也不遂生成之由則人無得頤養之
實然唯以春爲青眼者何也蓋春之於五
常爲仁溫潤和暖旣無坐氈之蒸暑又無
砭肌之祁寒况無秋殺嚴厲之氣乎梅曆

發歲以頌時於殘臘日霞簇凍解而韶華
靉黷四表自是以降紅紫如錦風簸蜀江
之浪粉白裁羅笠戴吳天之雪芳草茁于
池塘茸茸成茵柳絮糝於幽徑淡淡鋪氈
當是之時也鶯語蝶戲山笑谷應一草不
花春猶有恨然則物之無情尚得識天真
况於人乎故自貴介公子暨鄙夫細民乘
車跨馬著屐扶杖開筵盤樂含觴痛飲或

綴古雅之句或吟國風之歌膏雨細細濕
夜無厭惠風剪剪吹面不寒翫遊絲於靜
日恨落英之夕陽夜宴繼晷深更秉燭掬
水弄溶溶之月倚欄看重重之影誇刻千
金唱香滿衣旣而三分爲塵一春已暮晚
風悽然花亦洒淚吾貧無儲侍之具拙乏
雅頌之才然而每春幽賞頗不背花乃感
光陰過客載肉崇酒送其往矣

春秋備考序

羅山林先生嘗稱惺窩藤先生之言語我
家公曰讀易久則如自暗室出于露臺彌
久彌明讀春秋久則如暗室而入屋漏彌
熟彌暗傳聞之家公竊以易之爲書文王
演伏犧之卦周公推本文王亦演伏犧之
爻孔子作十翼折衷乎三聖人卦爻之理
釋然而解且易象數也察其象推其數則

思過半矣春秋也者成於孔子一人之筆
削而游夏尚不能贊一辭一字褒貶辭微
指博然無後來繼之之聖孟軻氏雖發明
之僅舉其綱領而已自是以降屬辭比事
卽詞觀義者不可選紀然聖人之蘊奧深
遠不容窺其涯涘如王氏之學以爲斷爛
朝報而貢舉不以設官取士最爲誤焉大
凡此書或抑或縱或予或奪或進或退或

微或顯而得乎義理之安是非之公夫學
之者可必優遊涵詠默識心通然後能造
其微自胡文定公出舍但六經蠹食三傳
啖嚼子史而作集傳於是聖人之用百王
之法粲然而明赫然而顯家公推尊集傳
屢講春秋終篇者再年老目眇每爲弟子
使傳說之親在側而聞之其每講也集傳
之來處諸子之註釋所有助者悉寫其齷

頭及註文之傍家公既沒手澤尚存傳嘗
欲輯爲一書而公事紛拏未敢果焉近歲
辱奉教命聊蒙親近日日出仕官司頗廢
學業一日一二之同志來見家公遺書勵
傳曰先師勤矣子嗣芳躅有年于茲何不
鈔出而成書乎若欲編之吾曹亦携一二
卷爲子戮力於是傳敬罔靡從發憤起筆
每有官暇或寫一句一章雖隻字半畫不

假他手積歲而僞功卷數十二名曰春秋
備考因謝嚮所勸之同志曰誠微子言殆
不終業同志遷延而辭避或謂先師嘗作
五經童子問未滿意而焚之今子所輯錄
乃先師之所鈔粹也然則名之曰童子問
不亦可歟傳答曰子言誠是然傳謏學謏
聞其所編集未知稱家公之意否唯備乎
讀胡傳者之考而已傳幸生于昌平之代

浴于文教之化才雖以此罷駑目頗免爲
石勒初學之士得以此編爲階而登魯臺
不亦樂乎

跋莊子口義棧航

棧者何閣木棧山嶮也航者何剗木航海
洋也斯棧也斯航也而後口義之高深可
以窺測也所音釋陸德明林希逸之解也
所分註六經及諸子百家之文也彼遊乎

赤水登乎崑崙者尚亦有利哉至其訓點
亦多質正叟口讀傳手寫卒脫其藁叟已
沒傳恐其書腐蠹故繡之梓而壽其傳叟
者誰名壹字道生號卜幽軒也

跋東見記

羅山林先生命世之才也於其學也上自
六經下至子史暨本朝古記無不該讀故
有叩之者答如鐘之應筵初家君在洛欣

慕先生之風既來東武執贄謁見退公之
暇挾冊問字先生與其篤信不懈叮嚀教
誨自是以來擬策問對之場講習討論之
席花朝月夜陶炙有年因用冊子劄記先
生所語本朝異邦之故事摸倣呂與叔東
見錄而自作序題曰東見記方今依剞劂
氏之請登梓以貽後葉云

跋林塘集

林塘集者家君卜幽軒遺稿也君嘗命傳
曰余自志學潛心六經不識作詩爲文比
壯頗屬詩文而性拙不巧文思亦不必修
飾推敲唯感物言志而已余平日所著文
及詩有數十卷若得暇日是正以屬汝矣
自後適有火災稿本忽爲烏有君亦尋卒
然君所言諄諄乎恰如提耳傳才微學寡
校君遺書恐有金根菟裘之謬不果多年

而今蒐輯其遺稿得文二十餘篇詩百數十首鱗次以爲二卷名曰林塘集林塘乃君之別號也於是請整字林公爲之序從兄宜卿亦作叙傳傳遂手親書全篇以鏤之梓非敢當高明達識之觀冀俾子孫思先人之勉學也於是乎跋

書
寄宅坤德書

傳白數日不接芝眉伏惟足下體履佳勝此間幕下令天下止殉矣是撫四海傷萬民之善緒也原夫上古葬以芻靈爲從衛中古易之以備及其流弊秦武公沒從死者六十六人至獻公止之雖穆公之賢不免弊習遂用百七十七人而奄息仲行鍼

虎與焉三子皆國之良而一旦殲之是黃
鳥之哀所以興也其後始皇之葬後宮皆
從死工匠生閉墓中尚何怪哉宜矣仲尼
曰始作俑者其無後乎爲其象人而用之
也我朝之昔頗欲效之當垂仁朝止之中
間復習爲常延及昨今然往年水戶先公
薨遺言謂嗣侯必勿從死是我素志也屬
續之後嗣侯禁之而志殉者曰公事無監

豈爲違命雖然惟蓀多思不報以死我曹
禽獸也禽獸不忍爲之敢固請焉嗣侯曰
是乃先公之志而我傳命我實先公之嗣
子也汝曹將從死之心而仕我先公豈爲
汝曹有黑心哉不隨遺命又背我言何面
目見先公於地下然則死亦胡黨之乎故
我諄諄論之於是各不能對以服事矣是
天下所以旁識而中興之權輿也陰謂幕

下之所令實嚮先公之遺風也非乎是知
嗣侯修學好古聰明拔群之故已餘慶逮
山野不耐抃躍尚期黎元鼓腹之日共聞
擊壤之歌延頸而竢徽雨新晴薰風涸泥
在玉一來萬布面頌不悉

奉竹洞主人書

傳頓頭言孔子有云苗而不秀者有矣夫
秀而不實者有矣夫是貴自勉之謂也

夫尊父嘗應官命奉仕幕府以醫名世足
下自幼好學生稟篤實事父母而致孝事
師友以盡禮常謂不知易豈云醫乎素問
奧義難經簡古非我儒不克讀之故洞視
群史旁通諸子親炙于羅山林先生辨義
質疑先生愛其雅才詩席文簞講習討論
皆令足下關焉往歲雞林官使來足下從
向陽讀耕二先生面覲文談世人之所矧

知也可謂苗而秀者也爾來覃思日懷其
德孜孜不怠表表愈偉于花于鳥有玩弄
之吟于雪于月作嘯詠之章綴語腹稿屈
宋之竒崛手筆宿構陶謝之碎金今茲辛
丑閏八月辱被選擇排向陽先生之班先
生當世鴻儒也足下未至而立與斯人肩
從以文行夙成才識卓越也可謂秀而實
者也旦喜足下始以儒立身令弟亦幹父

之蠱則伯仲共有連璧之譽君慎旃哉傳
初在洛杏間芳聲今來東武親接多標欣
抃曷勝而智愚懸隔猶草有薰蕕水有涇
渭嗚呼足下我門之上客也傳雖不敏不
宜默默而止謹述鄙誠伏祈昭鑒傳頓頭
言
寄舜水朱先生書
古曰敬勝怠者吉怠勝敬者滅敬則萬善

立怠則萬善廢蓋周文小心所以萬善之
立也殷紂作暴所以萬善之廢也伏惟我
大君位高身貴以居權要天資寬仁才幹
兼人上蒐六藝之文下獵百家之書種學
績文懷道守義曾幹先君之盥撫事戰慄
夙夜無怠仁政遍于闔境芳聲冠于當代
勉強好古恭莊愛士廷無誹謗野無遺賢
茲補國史之缺將興庠序之廢賑貧窶以

恤孤賜八杖而養老黔首喜耕于野工商
願立于市闔國繁榮可以知矣傳愚庸難
窺閫奧而鳳凰芝艸賢愚皆以爲美瑞豈
自欺哉上閣下啓訓辭至懇命傳答謝焉
茲吐露鄙誠以贅之不宣

復弘文學士林先生書

十月十二日傳再拜本月初八日辱惠琅
翰拜讀數矣如侍玉樹之前就審貴恙良

已欣慰幸甚一別以來奔走官路息踵不暇故未獲裁書奉候清履罪更甚矣不意辱函書之賜欣悚兼至抑呈寡君封翰板援古昔詞義高遠三四讀尚難窺測焉寡君圭復不置益深勤企時會舍郭外卽今促歸無遑回報命僕謝之時維祁寒願調護珍重傳再拜

答礪慶般書

辱蒙教諭副以挽詞一章圭復數回就想某罪逆深重不自死滅禍延先妣泣血號天歎歎不可禁皇皇望望如耳其聲如目其貌雖然生前反面死後撫棺亦幸而已忽得慰問澆胸磊塊厚意豈虛辱之然後喪不耐言詩故不賡之東歸亦在邇哀慟別情兼至涕泗交頤荒迷不次足下憐察之萬容面布旦謝且答

寄人乞筆書

八月六日絳縣陳子墨再拜致書前中書
令宣城毛生足下夙仰芳聲渴望惟久更
懷慕藺徒切識荆僕初浮海時相伴數輩
各自離散分附東西僕與一兩輩寄寓館
主幸以知字撰舉我儕爲客卿親寵篤矣
然僕絳人也絳縣之產雖不如弘農之壽
又稍延年如僕及頽齡待斃以月然猶矍

鑠與諸友涵泳紫潭優游剡溪仰尼山月
對經史花比年我友頴子頭禿腰僂不能
品列文簞寢尸一房曾聞足下乘桴投來
喜溢眉宇冀得一聽謦咳伏以足下之先
君佐禹治東土封于卯地以降管城侯彊
記便敏自上一人下及國人無不愛重而
辱與僕曩袒松滋侯結交友善然則僕與
足下有通家之親同遊于異城足下不以

我無似一舉玉趾蒙過環堵携手文苑挹
袂詞林乘興遣情曷樂加之惟時新涼入
郊牆紫可親拂烏絲欄以竅焉不宣陳子
墨再拜

贈人酒書

初二日宣城毛尖頓首白弘農陶生足下
踈迹光霽懷望玄襟三秋之想不能已矣
問動止安閑僕嘗避本邦之亂飄零海外

不知依託恍乎若或失之足下器度端方
中心坦然玉德金聲玄默堅潤假我恩澤
深情如解令僕寓于井丈人文人愛僕尤
切而未任一事僕以無能過受渥寵退顧
爲歎不意以丈人之推薦得仕館主與陳
客卿共仕職事使掌書記僕雖使頭禿神
竭敢惜精力乎故日侍文房無有閑暇加
之頃日館主有族喪僕等陪從左右頗爲

勉慰是以不獲趨候特倩壺公縮地符附
遣麴道士以問起居道士南都人也其性
風雅使人能醉其德故無貴賤老少渴慕
傾情宛如故青州從事我族猩猩翁嘗親
罷之呼號歡伯僕以其舊知每會爲歡盡
樂今价寄言慰案下之寂間將適足下之
口語否伏惟亮恕侍弟宣城毛尖頓首
井井堂集卷之七終

井井堂集卷之八

小野傳子傳甫著

革惟新校

哀辭祭文

先妣人見氏告詞

嗚呼尊靈性質婉婉惻隱愛人老少能懷
九族斯睦曾任人間六十九年生我劬勞
提攜捧負念寒而衣念饑以食僕十有一

而出就季父學醫術有年性有嗜學之癖
負笈擔囊去洛居東武是乃尊靈之所許
也嗚呼不意一旦尊靈寢食違常遂有膏
肓之患今春遙聞沈痾無聊趨奔跋躄數
日而歸晤語底豫如夢一覺已侍慈闈五
日永訣終天嗚呼反面之日取僕手曰舊
臘我將死而得病間是蒞汝來也乎僕往
歲東行也正月二十二日而今尊靈屬纊

亦當此月日何為同耶彼則生別而有再
會之期此則永歸而無復來之時何為不
相同耶悲哉痛哉生不借居病不嘗藥虧
定省凡六年常抱仁傑望雲之思徒耻陽
城歸養之言寤辟泣血無所逃罪也嗚呼
逝者不可追齊衰期者不敢不及家君縱
爾襄事墳墓已營羊胛光陰彌旬如瞽官
仕羈絆席不暇煖邇日敬持遺體將赴東

土不勝悲切感慕之至洒掃封塋祇薦清酌庶羞以告別伏惟恩靈如在鑒此哀誠

先妣野孺人小祥哀辭

傳本生先妣野孺人生于洛陽終于洛陽春秋六十有九傳自幼及長劬勞鞠育者二十餘年往歲就學東武離違膝下奄忽六載孺人一旦卧病傳不得侍奉湯藥遂卒於乙巳春正月二十二日光陰不居倏

爾屆於小祥嗚呼生我之勞育我之恩昊天罔極何以報之追慕感愴姑爲之辭以哀云

葆婉婉兮有愉容逮古稀兮遂三從性博愛兮又溫潤質循直兮族相親治閭內兮事必肅勤女紅兮供衣服凡使子兮教以勉男手筆兮女絲繭嬰疾疹兮不起床藥徒良兮病膏肓北堂邊兮風恣吹萱之茁

兮忽傷萎七旬至矣擬稱觴親不在兮辭
洞房子女泣血兮有弟嗚咽窀穸不及兮
終天永訣歲月逝兮不少留春露濡兮已
一周檐梅郁兮花濺淚魂不還兮增追思
黃鳥鳴兮聒我耳為何人兮徒喚起鳥依
舊兮花再紅慈闈寂兮獨不同小祥已屆
兮櫛中瞻主篆煙靄靄兮然香一炷幽冥
杳兮又遠而靈有知兮知我悲慈容儼兮

覩羹牆烏虆哀哉何能忘

題哀辭後

三年之喪上自一人下達萬民所謂通喪
也然本朝功令父母之喪制服一年近世
又不能行遽以五十日已夫以一年易三
年猶以為短况五十日乎至於鄙野之人
甚而三十五日又甚而三十日而釋吉可
謂愛其親乎自初喪之日飯僧招賓醉飽

宴集與平日無異習以爲常恬不爲怪若夫縉紳先生志古之士豈爲哀痛慘怛之情豈無素冠素鞵之慕然不能違俗亦以五十日爲居喪之限子生三年然後免於父母之懷夫豈不義而孔子言之然則今之短喪者宰予之流乎抑亦聖人之徒乎原夫本朝短喪之始自王子廐戶作俑舉國歸佛業懈志倦喪民秉彛遂使浮屠之

法月盛人倫之道日衰固可傷矣比年天主耶蘇之國禁甚厲因欲以佛之道療之有一夫一婦不歸於佛吏輒收之以爲天主以爲耶蘇故無貴無賤無男無女轂擊肩摩履舄交錯詣佛寺禮髡緇闔國四民以萬萬數悉淪陷于佛之塗泥墮墜于佛之坑穽是猶以烏頭療饑而以膠舟拯溺也鮮克濟矣嗟乎人之愚也一至此乎知

天主之爲害而不知佛之爲害又一天主
又一耶蘇也所謂前門拒虎後門進狼也
知天主之爲害而不知佛之害更甚於天
主甚於耶蘇也所謂以百步之走笑五十
步之走也昔之惑於天主耶蘇也不過十
室中之一人爾或百室中之二三人爾固
未嘗舉國而從邪也今乃驅天下而納之
於佛則普天率土尚有一人之得自免乎

迷者怵於其平日之所爲艷於其後日之
所獲固老死而不知悔矣中立者既入其
門庇其教勢不得不隨聲附和人是亦是
人非亦非矣上焉者雖有高才明智卓然
知佛之爲害然亦無計可以自拔而淪昏
以鋪已嗚呼慘亦甚矣所謂惡齒決之非
禮而矯之以放飯流歡也矯之以載號載
呶亂我籩豆也嗚呼慘亦甚矣若使國人

知歸佛之無益尋本澄源則天主之教何
由得施豈不舉數百年之患害而彈指驅
除之乎何當事者處於厝火積薪之下而
莫之知懼也抑流俗月忌年忌之說本浮
圖七七百日之儀蓋人無每月一死之理
然於人子追遠不忘之情潔齊致祭或亦
無害然不必作佛事也至若年忌則有終
身之喪何舉終身之內以幾年幾年爲節

謬亦甚矣即以彼之道言之大藏經五千
函亦無遠忌之說而本朝古禮初未之間
及中葉藤通憲死其子欲爲父修十三廻
之追薦是其權輿乎尋其所由則出於浮
屠惑世誣民貪婪視金而爲之也往歲不
幸丁內艱賜暇歸洛從家君之命襄事葬
具用萱堂之豫備者只作槨櫛藏之葬于
洛之五條鹽竈先塋之側居喪則隨俗例

用五十日旋來東武以官守在公不能自
盡也以爲人之後不能自主也凡朔望俗
節設神位泣拜而已禮有支子不祭之文
况傳爲人後者乎然我兄弟各遊宦異居
祀典不幾廢乎故以紙牌易神主祭畢焚
之亦猶行古之道也程子曰不若使之祭
猶愈于已此意可以深長思矣噫我居喪
也不能稱其服守禮也不得致其期然則

心喪乎心喪者身無衰麻之服而心有哀
戚之情是不藉乎他求者也今年春正月
二十二日爰及小祥喪將除矣於是齊戒
十日設薦練祭惴惴而慄悠悠而思昔閔
子三年喪畢切切而哀能自割以禮如我
不肖棘人勞心因爲哀辭以摠悲痛之情
且以告之同志云爾

勉亭林君哀辭

勉亭林君學士老先生之長子也其爲人
也溫潤重厚孝于家信于友自始志學手
不釋卷聖經賢傳諸子百家無不窺見當
世學徒無克出君之右往歲老先生奉教
命修國史君首就其事孳孳不懈三年于
茲其功未成而卒所謂服勤至死也古人
有云善不必壽惟道之聞一日爲老人皆
反是百稔猶幼由是言之君之早世是亦

黃耆也嗟乎君之卒也卿士大夫知之不
知無不哀戚况親炙從學者乎遂哀之以
辭

嗟嗟林君去世何早賢愚何必或壽或夭
亡之命矣更無所禱嗟嗟林君幼而岐嶷
既自知字志在翰墨焚膏繼晷勉焉學殖
學通史傳藝該六書講經義論彌高屬詩
賦志已摠孝弟忠信有孚孳如其能日新

其知歲增彬其英文才穎著稱願言道學
振宣勃興赫赫鉤命國史修之操觚散帙
辨論恢竒於乎沉痾遠嬰無由求藥焜燿
文彩忽歸冥冥秋風蕭索儒林凋落嗟嗟
林君惠好我人容衆嘉善教導諄諄遇然
每相會晤坐聞懸河之論春風秋月以遯
以嬉一朝蓋棺使人傷悲窀穸有時芥屋
爰封如聞其聲如見其容涕泗交頤零露

濃濃嗚呼

弔勉亭林君忌日文

夫白駒過隙駸駸不留榮衰在人箇箇互
來而昨日傾義無以兩旦疇昔清話難期
再會故以爲可愛者日也無常者人也然
則半面之識可不忠乎傾蓋之談可無情
乎况溢我助我者乎梅洞林君余之師友
也嚮余在京師聞君之高風渴望年久既

來東武投刺執謁薰陶親炙于茲八年其
間有可以喜焉有可以畏焉有可以惜焉
有可以哀焉君之於余情篤言其詩筵文
算必召預之優游晤語仰高鑽堅春花開
日同伴尋芳之杖秋桂生夕親侍登樓之
吟每攀韻綴句開示發蒙可謂知遠大者
而無井蛙之自矜也可以喜者此也君之
齒算僅二十四其於學也經史諸子無不

槩見隨手而讀讀過則記文詩景仰李杜
韓柳步涉歐蘇黃陳筆翰如流獨出諸儒
之表徃歲尊父奉鈞命修本朝通鑒課君
以昌泰至久壽修史之暇分館中諸僚設
經史詩文倭學科講習討論以勵群生君
服勤不倦以爲己任可謂間出之才也可
以畏者此也豈圖去歲丙午之秋君罹霜
露寢食違常歷日劇增諸醫束手百術無

聊嗚呼噫嘻時耶命耶天不假數年編修
未畢終爲易箚之訣可以惜者此也爾後
館中諸生門下學生坐花無興對月懷舊
如余輩傷心慘目將如之何君之早世人
無不惜之矧於尊父之哀感乎唯讀書而
消長日嘉談以送永夜日不在花月耳不
樂好音或把君之遺藁而爲淚之從爲覲
面之話不亦宜乎可以哀者此也雖然公

事無監尊父吞聲抑淚無倦於勤足成殘
課以終其功君有知也須軒眉於地下日
月不居奄及周忌余自夏末患瘡頃日稍
愈心體衰憊起卧未寧是以不能詣于墳
墓竟日閉戶獨坐寂間追懷往事悽愴無
極強揮禿毫漫攄哀情

祭土神文

維寬文九年歲次己酉九月辛卯朔越二

日壬辰常州水戶府備負儒臣野傳敢昭
告土地神伏惟地之爲德爲坤爲母含弘
光大柔順斯守資成萬物極天以久厚載
河海至靜而壽其於時也旺節序之季其
於色也呈元吉之瑞於五行則和其木火
金水於五常則信彼仁義禮智殷代之盛
朱堤溢出得金德周禮之備九州名山爲
地鎮方今相攸於城北將營一區之版屋

掃地剪草通徑洗竹神之保佑以詒多福
不騫不崩得朋得常壽福康寧應地無疆
吉蠲爲饗蘋蘩備儀謹伸奠獻神其歆之

源相公祭丹治信正謚恭子文

維延寶五年歲次丁巳十二月甲辰朔越
二十二日乙丑水戶侯源光圀以清酌庶
羞之奠致祭于故老臣朝散大夫東市令
丹治風軒謚恭子之靈曰惟靈清標夙成

茂行斯全器局廓爾剛毅黜然和順不褻
厚重而玄台命傳我先廟席前輔弼鹽梅
治烹小鮮窒慾遠利柄政無憲舉朝服善
闔境稱賢无妄之疾刀圭不痊積日累歲
隱几繚繚鼎爐當酒茗茶之煎泉石遣興
詠歌樂焉說劍譚兵錄作幾篇閑居養氣
二十餘年年高德邵才俊智圓嗚呼哀哉
造化所苦奄忽長眠失涕龍鐘往哭屯遭

速隔今古永訣終天蒞藻禮奠桃菊吉蠲
子孫請謚懿美應譔噫靈執禮御賓迎待
心專故謂之恭千載是傳聊寫哀誠以告
黃泉嗚呼哀哉尚饗

祭明徵士朱先生文

年月日謹以縗牲粢盛敬致祭于故大明
徵君文恭朱老先生之靈曰嗟嗟先生族
出明室棣棣德容彬彬文質學通六藝不

作而述道義無餒秉禮踐實明室政頽世
乏良弼先生早識徵辟不出遭邦多難軼
軻慨慷乘桴零丁覽輝扶桑游事我君幾
二十霜臨顧尊齒優禮過望我曹肆業親
窺仞牆問禮學文懇款無量忠告善道何
日而忘嗚呼哀哉一朝永訣音容渺茫良
日爲饕設祭祠堂神其鑒之以來以嘗

祭岳翁法橋三好公文

酒酌當作清酌

維延寶七年歲次己未十月癸亥朔越二
十一日癸未子婿野傳謹以酒酌庶羞之
奠昭祭于丈人故法橋三好公之靈曰公
幼喪親養毓舅家及長好文聞道歡呀入
學足利頗摘藻華天性溫和春氣柔嘉禁
奢防佚存誠閑邪講醫江府刀圭業成青
囊金篋覃思研精軒岐幽曠用壽群氓扁
倉玄術茲超鄉英優仕常陽食祿代耕療

痼治病起死回生聲名彰聞奚爲過情爵
位期叙衣裳鮮明貴介公子立候送迎公
之於世極人間榮法橋之選朝之所注食
邑之賞人之所慕公之洒落有而不顧晚
罹疾病辭祿宦路始我知公爲老成人冰
語通家夙奉良姻歡洽如志眷撫維新豈
圖昊天降厲荐臻嗚呼哀哉公住海滢我
在江濱我君還邦我每扈從相見數月綢

繆情鍾而恨平生多別少逢自今永訣間
絕音容公之於家謂五女門四女既嫁季
將求婚我幸有子母教弟昆知方與數能
食能言恨公存日未見二孫嗚呼哀哉病
不嘗藥葬不撫棺官羈維絆惘然曷安鄉
風哀慟涕泗汎瀾河酌蒲觴蘊藻在盤舒
文洩哀長思漫漫嗚呼哀哉

相公追福靖定夫人諷誦

夫傾曦頽魄敢不再晨再圓浮泡奔湍烏
有復來復反天地如此人物亦然仰哀塵
世無常俛嘆死生有命春容幾日秋殺茲
嚴伏維顯妣靖定夫人法號久昌院心周
日勻婉婉以從勤肅而敬奉先君有婦德
睦族睦親遇侍婢乃惠和宜家宜室生我
勞瘁鞠我茲仁計寒以衣其衣慮饑而食
其食嗚呼哀哉風樹不靜露薤易晞夫人

一旦寢疾不痊招魂無復窀穸永訣居室
于歸川流不留歲月逾感一朝千古春夢
遽然豈圓十有七祀星霜瞥爾太速原念
往昔哀徹骨骸悲淚滂沱寤擗慟哭掘營
精舍正摸兜率內場請集衆僧以迎龍華
殘影願資冥福功德無量哀哀攬腸昊天
罔極于時延寶丁巳冬十一月十四日參
議從三位兼右近衛權中將源朝臣光圀

謹言

[Faint bleed-through text from the reverse side of the page]

碑誌

故從五位下東市正水戸大夫丹恭

子碑

公姓丹治諱信正字子直武州中山人也

大父家範事於北條氏天正中守八王寺

城而戰沒烈考信吉初仕東照閣下奉

鈞旨爲水戸侯傅表授從五位下拜備前

守公奉仕台德閣下難波之役扈從征

旗彼軍之潰騎兵三百餘奮戰而走我卒
三十許人畏懼其勢伏葦田畦公叱之曰
汝曹見敵而伏何爲怯乎於是衆卒連放
鳥銃公單騎追擊之自是以降 閤下朝
于京師無昔不從寬永元年特命爲水戶
大夫與父秉政朝野清平皆稱其善尋叙
從五位下爲東市正遂襲父祿任政有年
既而患軟脚疾於是慶安五年請以致仕

薙髮號風軒公無子養弟信治爲嗣公資
質和順而沉剛清廉而慤實容貌魁偉聲
力過人常慕古風最崇神道講武之暇時
詠和歌又嘗爲幼孫著書上本天理下至
治國終謂兵凶器不得已而用之自始致
事卜居於國城北北河原後又遷大貫濱
都下諸士不敢憚遠而更候其門公迎待
太渥煮茶圍碁清談竟日爲人所慕大槩

如此相公襲封于水戶凡每就國屢顧問
焉恩禮有加公壽登七十八十之歲必期
生日親就其第賚儿杖及繒帛設盛宴以
賀焉其爲君所寵也亦如此公閑居養老
二十餘年知死期之稍近而知其居僻遠
而鉅細不便又歸都內踰年寢疾相公臨
視之病劇遺言曰我死乃擇郭外不毛之
地畫可方百步以葬之須周植以花木希

有親戚朋友來過吟咏遣興使士風漸于
溫雅矣明日遷於正寢著新衣衾奄然而
終公生于文祿甲午十一月二十三日卒
于延寶丁巳十月二十八日壽八十四賜
諡恭子遂葬于北郭常盤岡銘曰
夙從戰場赴赴維揚燮理邦域護衛社稷
勳績已多剛毅又和肥遯致事閑居養志
處仁而壽聲譽不朽

水戶府野傳撰文

鶴山野節篆額

中村義竹書

延寶戊午十月二十八日孝子從五位

下備前守信治立

故致仕鴻儒卜幽軒野先生碑

先生姓野名壹字道生號卜幽軒其先武
州人見邑人也中葉遷居於丹波馬地父

友德叟移家于平安城慶長己亥三月先
生生于二條烏丸客舍叟多子同里柏原
氏養先生爲子柏原氏家貧先生既長教
以俗事先生常傭書供養之及二十餘歲
覺其業之不淑始學讀書日夜無怠至忘
寢食於是就教授菅玄同載酒問字遂爲
鄉里所稱書生負笈者盈門京師貴戚豪
舉就學者多柏原氏沒復其本姓其後羅

山林夫子賜官暇還京師先生往受學講授無止爾後彌親炙之寬永戊寅始來于江都仕水戶威公侍講有年其世子好學善遇之寬文辛丑威公棄世世子襲封水戶侯先生年老患眼疾不能勤仕占一地于郭外開白賁園築把茅亭灌花種菜自樂水戶侯懇遇如初先生無子養其婦子傳爲嗣自知其疾難愈作白賁園記及歌

常語子姪曰我死葬于此故以此歌爲臨終之辭戊申春先生齡及耆希致仕水戶侯忝賜儿杖及壽詞事詳于行狀嗚呼是歲庚戌秋七月二十六日奄然而逝年七十二臨終歌曰白賁无咎兮築園結棲武城正北兮杏壇以西靜坐葦席兮吟行蔬畦孳孳得正兮斃後何後傳與同族節篤等相議以白賁園之下隰相攸於其北隅

谷中邑葬之以儒禮建碑略記事實

淨鑑院英譽崇巖武田君碑

碑高四尺闊壹

尺四寸厚九寸半為圭首方附高壹尺三寸六分闊貳尺四寸貳分

厚壹尺六寸碑石下餘四寸許容于附上

君姓源諱信吉乳名萬千代東照公第

五子故稱五郎母號下山越前守秋山虎

康之女君以天正十一年生初甲州武田

族穴山玄蕃信君屬公之部下累有勲勞

信君死無子公思舊勲愍其無嗣以君為

之後以若狹少將豐臣勝俊女為妻君生

而多病常自暇逸慶長七年十一月封于

常州水戶八年九月十一日卒於水戶府

年二十一葬郭內佛寺君蚤世無後恐久

而佳城湮沒故移葬於太田鄉瑞龍山先

壠之旁

延寶己未九月十一日水戶侯源光園

立

處姉慧了院達心日具碑陰圭首方

而封丈三尺六寸半濶壹尺貳寸半厚八

尺五寸碑石濶貳尺貳寸厚壹

下容跗三寸

先姊諱通子水戶侯源威公長女也母圓

理院佐佐木氏寬永元年五月二十九日

生正保三年二月納右大將藤道昭聘結

禱抵京未及合甕而道昭逝先姊守節寡

居幾二十年寬文四年十月二十三日卒

于水戶府時年四十一法號慧了院達心

日具 水戶嗣侯源光圀立

源龜丸碑陰石高壹尺四分濶貳尺

濶貳尺五寸厚壹尺三寸貳分

龜丸君四歲卒以其下殤不可用

水戶侯源威公之第一子圓理院佐佐木

氏所生寬永五年十一月四日年四歲卒

法號本妙院

水戶侯源光園立

先考簡良子碑陰

以下八碑皆圭首

九寸闊壹尺五分厚壹尺八寸附高三寸

先考諱賴利號主米水戶侯源威公第六

子母證真院三木氏先考生於寬永七年

七月三日卒於延寶二年十二月二日年

四十五歲諡簡良

孝子賴道立

故叔父懿孝子碑陰

君諱賴以號伊織水戶侯源威公第八子

母丹波氏號厚善院寬永八年閏十月二

十九日生寬文四年四月八日卒行年三

十四歲諡曰懿孝

姪賴道立

先母圖理院法珠日意碑陰

先母氏佐佐木諱勝生於伊勢父五郎左

衛門正勝嘗仕織田信雄後仕讚州太守

生駒一正冒母氏改藤川先母事水戶侯

源威公生三男五女寬文元年辛丑六月朔日卒于水戶府享年六十一歲法名圖理院法珠日意

孝子從四位下行侍從兼刑部大輔源賴元立

故庶母真善院妙相日有碑陰

庶母氏大井田諱七事水戶侯源威公生二女明曆元年三月二十六日卒年四十

七歲法號真善院妙相日有

水戶嗣侯源光圀立

先祖母證真院妙貞日元碑陰

先祖母氏三木諱玉奉仕水戶侯源威公生先考賴利延寶三年四月二十七日卒于水戶府享年六十八歲法號證真院妙貞日元
承重孝孫賴道立

先母厚善院妙久日成碑陰

先母氏丹波諱愛事水戶侯源威公生賴
以及房時延寶戊午六月四日卒年六十
二歲法號厚善院妙久日成

源房時立

故庶母長松院妙感日應碑陰

庶母諱旬事水戶侯源威公生二女寬永
十七年六月二十七日卒時年三十四歲
法號長松院妙感日應

水戶嗣侯源光園立

顯妣證智院法圓日慧碑陰

顯妣諱千水戶侯源威公第十女也母圓
理院佐佐木氏寬永十二年正月二十五
日生寬文三年二月下嫁于家父生景忠
及一女子延寶九年三月二十三日卒于
水戶府時年四十七法號證智院法圓日
慧

哀子真木景忠立

高雲院日啓碑陰

嗚呼昔汝初生也延寶七年十月十六日
時我在江府逮還水戶始見汝顏祝汝壽
堅而久命名鍋千代然汝受壽不長九年
六月二十六日三歲而夭終葬于稻置邑
久昌寺內法號高雲院日啓毋山木氏

阿爺羽林次將源九成誌

顯妣清涼院妙信橘氏碑陰

顯妣姓橘名以與父名連乘興正寺權僧
正圓超之弟也妣以正保元年十二月五
日生于京師月日嫁家君天和二年八月
二十九日卒于水戶府時年三十九法號
清涼院妙信終葬太田瑞龍之旁

哀子源賴安立

顯妣長壽院妙證日禎碑陰

顯妣諱萬水戶侯源威公第二女也母圓

理院佐佐木氏寬永四年正月八日生正
保四年十一月下嫁于家父生資真及三
女元祿二年正月八日卒于水戶府年六
十三法號長壽院妙證日禎

哀子太田資真立

法橋牛菴畠山隨世碑陰

君姓源氏畠山幼名長八郎諱義高後改
隨世號牛菴又稱桂菴義深十四世之孫

也曾祖左衛門督昭高爲家臣遊佐政賢
被滅城陷祖父長政幼而僅遁于泉州堺
邑後薙髮名光安業醫居洛父光政剃髮
名牛安繼醫業奉仕水戶侯君以寬永三
年丙寅生教命嗣家爲醫寬文二年壬寅
十二月朔叙法橋位娶山崎氏女生三男
三女而三男二女皆夭長女嫁于從五位
下甲斐守永井尚申生采女直勇及二男

二女君養彦坂氏子梁菴隨道爲嗣元祿
六年癸酉四月二十七日卒于武州江戶
小石川時年六十八葬于城北吉祥禪寺

源威公墓誌

府君姓源諱賴房小名鶴麻呂 東照公
第十一子母正木氏左近太夫平康長女
公以侍女太田康資女母養之慶長十年
乙巳封常州下妻十四年己酉移封同州

水戸食二十八萬石累歷近衛少將中將
參議任權中納言叙正三位寬文元年辛
丑七月二十九日薨于水戸城年五十九
謚曰威公葬於久慈郡太田鄉瑞龍山

靖定藤夫人墓誌

太夫人姓藤原氏谷諱久子左馬助重則
女事水戸威公生賴重光圀寬文元年辛

丑十一月十四日卒武州豐島郡小石川
邸年五十八諡曰靖定法號久昌院心周
日勻葬于常州水戶城西城王教寺延寶
五年丁巳十一月四日改葬久慈郡太田
鄉瑞龍山 水戶侯源光園誌

哀文藤夫人墓誌

夫人姓藤原諱尋子稱泰公近衛關白左
大臣信尋公女母藪權大納言藤原嗣良

卿女承應三年甲午三月十二日下嫁於
我萬治元年戊戌十二月二十三日薨于
武州豐島郡駒込別墅諡哀文法號法光
院圓空覺心以某月某日葬常州茨城郡
吉田山藥王教院側延寶五年丁巳十二
月五日改葬久慈郡太田鄉瑞龍山
水戶侯源光園誌

覺林院圓譽心月元正墓誌

弟姓源諱房時小名武庫麻呂後稱主殿
又稱權亮水戶威公第十子母丹波氏從
四位下信濃守賴房女天和二年壬戌八
月十九日卒于水戶第年五十法號覺林
院圓譽心月元正葬久慈郡太田鄉瑞龍
山

水戶侯光圀誌

源重義墓誌

弟姓源諱重義稱武藏水戶威公第十一

子母興正寺權僧正昭玄女後家臣雜賀
孫一郎重次養爲子冒姓穗積氏雜賀改
孫三郎尋稱孫一郎寬文八年戊申九月
六日卒于武州豐島郡駒込旅館年三十
二法名貞壽葬常州久慈郡太田鄉瑞龍
山

青松院貞譽心光誓圓墓誌

妹姓源諱布里水戶威公第八女母姓某

氏某名旬寬文二年壬寅二月二十二日
嫁于本多出雲守藤原政利七年丁未四
月十二日卒于武州豐島郡江戸下谷第
年三十五法號青松院貞譽心光誓圓葬
于同郡雲光教院天和三年癸亥二月某
日改葬于常州久慈郡太田鄉瑞龍山
水戶侯光圀誌
清雲院妙黷日布墓誌

妹姓源名市水戶威公第十二女母大井
田忠兵衛源義能女寬文三年十一月二
十七日下嫁家臣周防守酒井忠治生忠
敬尼清山及三女元祿三年庚午正月四
日卒于水戶第年五十二法號清雲院妙
黷日布葬于久慈郡太田鄉瑞龍山
水戶侯光圀誌

靖伯世子墓誌

男姓源初諱賴世小名松千代麻呂後稱
右京兄讚州太守賴重第一子母少將土
井利勝女寬文三年十二月十二日養爲
嗣叙從四位下任左近衛權少將嚴有
公賜諱一字改曰綱方十年庚戌正月二
十二日卒于武州江戸小石川邸年二十
三矣謚曰靖伯葬于常州久慈郡太田鄉
瑞龍山水戸侯光圀誌

從四位下侍從源賴元墓誌
府君姓源諱賴元小名兒麻呂後稱丹波
水戸威公第四子母佐佐木氏以寬永六
年己巳七月十四日生于常州水戸城其
爲人常嗜武講孫吳之法旦好佛扣教禪
之奧二十年癸未五月十八日始謁幕府
正保三年丙戌十二月晦叙從四位下任
侍從兼刑部大輔寬文元年辛丑九月二

十六日食邑二萬石于常州娶小笠原右
近將監源忠真女生二男六女曰賴貞從
四位下大學頭曰政武出爲本多氏後從
四位下中務大輔曰胤子嫁相馬彈正少
弼平昌胤曰長子次久米子在室曰幸松
元三女歿妾某氏生二男一女曰武之佐
賴愛曰小三郎女曰彌歿元祿六年癸酉
四月二十八日卒于武州江戸大塚第年

六十五五月七日葬于常州久慈郡太田
鄉瑞龍山生日親書法號以遺諸篁筍真
源院靈方無外大居士云

孝子賴貞誌

井々堂集跋
古之井々云者其旨至矣且盡
矣實有條理詩也文也不易直
何杼藻不有條理何成章名其
堂曰井々遺稿亦然有理有條

者懋齊先生文學之謂乎先生
者余三從兄而年不相如余生
髮未乾已聞其名童蒙而與余
祖考於坐對打話之間恍々然
略覺其容貌聲音既及視遺文

彷彿眉宇之間夫先生之學業
精勤曾因先覺及家父之言知
其大略終始不違果知其實事
君父能竭其力行有餘力則可
謂學文矣先生之於詩也貞固

平穩先生之於文也篤實賅博
其淵亦幹父之事編緝詩文固
野家遺響嫻々脉々吟其詩誦
其文則不見其人不聞其聲而
心跡粲然如洞見肺腑矣不勉

已而欲勉人不亦難乎嗚呼先
生之格言爲其老巨筆也與江
風遠與山月淨奕葉不朽復夫
在茲余有所感慨挹筆而題其

卷尾焉

享保八年癸卯後月

雪江野活實函甫

風盡興也
生之味言
已而始後
公不亦
難乎
知和
決

